



**PERUTUSAN DATUK BANDAR
MESYUARAT MAJLIS BIL. 4/2019
29 APRIL 2019 (23 SYAABAN 1440H)**

BISMILLAHIRRAHMANIRRAHIM

Assalamualaikum WBT dan Salam Sejahtera.

1. Saya ingin mengucapkan terima kasih kepada Ahli-ahli Majlis, Ketua-ketua jabatan dan pegawai-pegawai serta seluruh warga kerja MBPJ di atas kerjasama dan komitmen kepada Majlis khususnya di dalam merealisasikan segala perancangan dan program Majlis. Segala pencapaian dan kejayaan pastinya menuntut komitmen yang jitu dan pelaksanaan sistem penyampaian perkhidmatan (*delivery system*) yang berkesan dan semangat kerja berpasukan di antara Ahli Majlis dan warga kerja Majlis. Justeru itu, di dalam menggalas tanggungjawab ini adalah amat penting bagi semua warga kerja dan Ahli-ahli Majlis memahami, menghayati dan seterusnya melaksanakan tanggungjawab masing-masing dengan tahap professionalism masing-masing.

2. ANUGERAH SENI BINA LANDSKAP MALAYSIA 2019 : MAJLIS BANDARAYA PETALING JAYA RANGKUL ANUGERAH HONOR

Majlis Bandaraya Petaling Jaya telah diumumkan sebagai Pemegang Anugerah Honor di majlis Anugerah Senibina Landskap Malaysia 2019, yang berlangsung di salah sebuah hotel di Kelana Jaya, melalui projek komuniti Jabatan Landskap iaitu “**Soup Kitchen@Kebun Kita**”.

Anugerah ini merupakan tahun kedua berturut-turut Majlis menggondol anugerah yang sama di bawah kategori Inisiatif Hijau (Kerajaan) selepas memenangnya tahun sebelumnya bagi projek komuniti “Agrobox@Kebun Kita”.

Soup Kitchen@Kebun Kita merupakan projek perintis yang diadakan untuk membasmi kemiskinan bandar di sekitar Petaling Jaya. Projek ini bertujuan untuk membaik pulih gaya hidup dan persekitaran di sekitar penempatan perumahan rakyat dengan kerjasama Komuniti PPR Seksyen 8 Kota Damansara dan *Friends of Kota Damansara* (NGO).

Dilancarkan pada 9 April 2017, Jabatan Landskap telah mengenal pasti beberapa kawasan terbiar dan bermasalah berhampiran dengan gugusan pangsapuri PPR Seksyen 8 untuk dijadikan sebagai lokasi program Kebun Kita, iaitu program kebun komuniti PJ. Soup Kitchen merupakan salah satu inisiatif di Kebun Kita tersebut, di mana tanah terbiar itu, dengan kerjasama komuniti PPRT Seksyen 8, telah ditransformasikan kepada sebuah kebun sayur-sayuran organik, yang membekalkan makanan segar secara percuma kepada komuniti tersebut, terutama kepada keluarga-keluarga yang mengalami kekangan kewangan dan kesempitan hidup. Program ini juga menggunakan moto “**Utamakan Masyarakat**” yang memberi penekanan kepada kepentingan komuniti, melebihi kepentingan individu ataupun orang perseorangan.

Soup Kitchen@Kebun Kita merupakan bukti kejayaan kerjasama berterusan di antara badan kerajaan, komuniti dan NGO. Program ini telah menjadi platform untuk menaikkan taraf kehidupan masyarakat, memupuk sikap berpasukan dan suasana harmoni di kalangan masyarakat.

3. USAHAWAN MIKRO BAZAR RAMADAN DINAMIK 2019

Majlis Bandaraya Petaling Jaya (MBPJ) telah menganjurkan **Bengkel dan Taklimat Usahawan Mikro Bazar Ramadan Dinamik 2019** bertempat di Dewan Banquet, Dewan Sivik MBPJ. Bengkel dan taklimat ini adalah merupakan kursus bazar Ramadan yang dianjurkan oleh Majlis saban tahun.

Bengkel dan Taklimat Usahawan Mikro Bazar Ramadan Dinamik 2019 merupakan satu platform pendidikan serta percambahan ilmu pengetahuan kepada usahawan mikro untuk mengembangkan perniagaan selepas tamat permit bazar ramadan. Pada masa yang sama, usahawan mikro akan didedahkan teknik perniagaan yang berkesan serta cara mudah mendapatkan bekalan barangan murah dan berpatutan.

Antara pengisian bengkel ini adalah sesi penerangan kempen sifar penggunaan beg plastik (*Roadmap Towards Zero Single Used Bag Plastic 2018-2030*) oleh Yayasan Hijau Malaysia, taklimat masyarakat tanpa tunai (*Cashless Society*) oleh wakil *Boost e-Wallet*, taklimat pemasaran produk atas talian oleh Syarikat Best Marketing Distribution Sdn. Bhd dan MYNIC Berhad, taklimat pematuhan syarat-syarat permit bazar, taklimat peniaga berintegriti (pencarian Pemenang Bazar Ramadan 2019) dan taklimat pelaksanaan kaedah pemantauan menggunakan sistem imbasan cap jari (*Thumb print*) dan sistem Demerit. Pada hari yang sama juga turut diadakan sesi cabutan undi tapak bazar ramadan bagi zon PJU dan zon PJS.

Seperti tahun-tahun sebelumnya, pelaksanaan pematuhan syarat permit bazar diteruskan dan diperketat agar pengurusan bazar lebih sistematik, bersih dan teratur. Statistik pelanggaran syarat permit bazar ramadan yang telah direkodkan bagi **tahun 2018** adalah seperti berikut:

Jenis Kesalahan	Zon PJU (407 Petak / Peniaga)	Zon PJS (697 Petak / Peniaga)
Tidak berniaga sendiri	64	127
Tidak berniaga langsung	114	115
Tukar petak	14	10
Tukar jenis jualan	6	10
Menggunakan lebih dari satu petak	3	15
Lain-lain kesalahan ketika mengendalikan makanan	70	156

Majlis komited terhadap isu peniaga tanpa lesen (PTL) di Petaling Jaya. Beberapa perancangan dan pelaksanaan konsep penyelesaian akan dijalankan di empat (4) lokasi yang telah dikenalpasti iaitu :

- i. Jalan Besar, Taman Dato Harun – lokasi penempatan : Di Jalan PJS 2/1, Taman Dato Harun
- ii. Jalan PJU 10/1, Damansara Damai – lokasi penempatan: Lot 70261 Jalan PJU 10/1 Damansara Damai
- iii. Jalan Cecawi Seksyen 6 dan Jalan Camar Seksyen 4 Kota Damansara dalam perancangan menempatkan semula mengikut konsep yang bersesuaian.

MBPJ juga telah melaksanakan **sistem imbasan cap jari (*Thumbprint*)** iaitu semua pemegang lesen perlu membuat pengesahan cap jari ketika menerima lesen pembaharuan atau lesen permohonan baru. Setakat April, penggunaan sistem imbasan cap jari

telah merekodkan seramai 18,383 pemegang lesen. Manakala seramai 3,135 pemegang lesen yang mempunyai masalah Mykad rosak atau masalah kesukaran jari untuk diimbas oleh sistem direkodkan secara manual.

Majlis juga akan melaksanakan **sistem demerit** iaitu setiap kesalahan yang dilakukan akan melalui sistem penolakan markah. Kategori kesalahan telah dijadualkan kepada dua (2) iaitu **kesalahan kritikal** dan **tidak kritikal**.

Bagi kesalahan kritikal penolakan markah lebih banyak berbanding dengan kesalahan tidak kritikal. Setiap penolakan markah ini akan disemak dan dibentangkan melalui satu jawatankuasa yang telah dilantik. Bagi kesalahan yang dilakukan, sistem pemarkahan dan tindakan susulan akan dijalankan seperti berikut:

Markah	Tindakan
20 markah pertama ditolak	Notis pemberitahuan kepepada pemegang lesen
40 markah terkumpul	Notis peringatan kepada pemegang lesen
50 markah terkumpul	Notis cadangan pembatalan kepada pemegang lesen

Pada tahun ini, Majlis akan menganjurkan **Program Jalinan Kasih** bersama usahawan mikro yang berminat untuk menyumbangkan makanan dan minuman bagi juadah berbuka puasa kepada golongan yang memerlukan seperti golongan asnaf, ibu tunggal, OKU dan lain-lain lagi. Program ini merupakan usaha Majlis untuk membantu golongan berkenaan ke arah *zero poverty* selari dengan matlamat dan objektif *sustainable development goals*.

Kerjasama antara Majlis dan usahawan yang berminat dapat memberi satu perkongsian yang baik kepada masyarakat di Petaling Jaya. Hasil sumbangan daripada program jalinan kasih ini akan dikumpul dan diserahkan kepada golongan terpilih melalui Ahli Majlis MBPJ setiap zon.

4. MAJLIS BANDARAYA PETALING JAYA SEMAI TABIAT MEMBACA

Pada 23 April 2019 yang lalu, Majlis telah mengadakan program **Jom Baca Bersama Untuk 10 Minit / *Let's Read Together For 10 Minutes*** yang telah diadakan untuk kali ke-6 sejak tahun 2014. Program ini merupakan sebuah program yang diadakan secara serentak di seluruh Malaysia yang bertujuan untuk memastikan tabiat atau budaya membaca di kalangan masyarakat setanding dengan negara maju di dunia. Objektif program ini juga seiring dengan sokongan dan dengan seruan Kerajaan dalam menuju ke arah **Dekad Membaca Kebangsaan 2030**.

Selain itu, program ini juga turut mendorong masyarakat membaca, di mulai dengan langkah awal selama 10 minit dan diharapkan budaya membaca selama 10 minit ini dijadikan budaya setiap hari dan sepanjang masa. Kerajaan juga telah mensasarkan Malaysia untuk menjadi negara maju dan salah satu indikator negara maju adalah kadar rakyatnya yang suka dan rajin membaca.

Pelaksanaan program ini diharapkan dapat memupuk dan menyemai minat membaca di kalangan rakyat Malaysia sekaligus menjadikan Perpustakaan Awam Negeri-negeri di seluruh negara relevan dan sangat dekat di hati masyarakat.

5. HARI TERBUKA SMART PJ WASTE SOLUTION LAB

Majlis Bandaraya Petaling Jaya telah menganjurkan Hari Terbuka Smart PJ Waste Solution Lab @SS2 pada 20 April 2019 yang lalu bertempat di Jalan SS 2/63, Petaling Jaya. Penganjuran program ini adalah bersempena **sambutan Hari Bumi** yang dianjurkan pada setiap 22 April sebagai usaha menghargai dan menyemai rasa tanggungjawab

serta meningkatkan kesedaran di kalangan masyarakat untuk melindungi bumi dan alam sekitar.

Antara aktiviti yang diadakan adalah jualan bahan tanaman tumbuhan seperti bahan kompos cecair (liquid compost), anak pokok, biji benih serta demonstrasi penggunaan kaedah penanaman sayur-sayuran secara hidroponik. Majlis juga turut memberikan 1 botol berkapasiti 1.5 liter bahan kompos cecair kepada 300 pengunjung terawal.

6. OPERASI BERSEPADU BERSAMA JABATAN IMIGRESEN NEGERI SELANGOR

Pada 23 April 2019 yang lalu, Majlis telah melaksanakan operasi penguatkuasaan secara bersepadu bersama Jabatan Imigresen Negeri Selangor ke atas aktiviti-aktiviti perniagaan yang melibatkan penjaja dan pusat mencuci kenderaan di sekitar kawasan Petaling Jaya.

Hasil daripada serbuan tersebut, sebanyak 11 pemeriksaan ke atas aktiviti perniagaan dan 45 pemeriksaan individu telah dilaksanakan. Majlis telah menjalankan 11 tindakan sitaan ke atas aktiviti perniagaan tanpa lesen. Manakala, seramai 18 individu telah ditahan untuk siasatan selanjutnya oleh pihak Jabatan Imigresen. Operasi-operasi sebegini akan diteruskan bagi memastikan aktiviti-aktiviti perniagaan mematuhi syarat-syarat serta garis panduan yang ditetapkan oleh pihak Majlis.

Sekian, terima kasih.